

7026 *REAL DECRETO 393/2006, do 31 de marzo, polo que se prorroga para o ano 2006 o programa de renda activa de inserción para desempregados con especiais necesidades económicas e dificultade para atopar emprego, regulado polo Real decreto 205/2005, do 25 de febreiro. («BOE» 94, do 20-4-2006.)*

O punto 4 da disposición derradeira quinta do texto refundido da Lei xeral da Seguridade Social, aprobado polo Real decreto lexislativo 1/1994, do 20 de xuño, habilita o Goberno a regular, dentro da acción protectora por desemprego, o establecemento dunha axuda específica denominada renda activa de inserción.

Polo Real decreto 205/2005, do 25 de febreiro, regulouse para o ano 2005 o programa de renda activa de inserción para desempregados con especiais necesidades económicas e dificultade para atopar emprego, e a disposición derradeira segunda do devandito real decreto permite que ese programa se poida prorrogar por disposición expresa do Goberno, após consulta a interlocutores sociais.

Por iso, considerando esa previsión normativa, así como a finalidade, o contido e os resultados alcanzados co programa, considérase conveniente prorrogar a súa vixencia para o ano 2006, vinculada ao orzamento para o devandito ano.

Na elaboración deste real decreto foron consultadas as organizacións empresariais e sindicais máis representativas.

Na súa virtude, por proposta do ministro de Traballo e Asuntos Sociais, de acordo co Consello de Estado e logo de deliberación do Consello de Ministros na súa reunión do día 31 de marzo de 2006,

DISPÓN O:

Artigo único. *Prórroga para o ano 2006 do programa de renda activa de inserción para desempregados con especiais necesidades económicas e dificultade para atopar emprego, regulado polo Real decreto 205/2005, do 25 de febreiro.*

Queda prorrogada para o ano 2006 a vixencia do programa de renda activa de inserción para desempregados con especiais necesidades económicas e dificultade para atopar emprego, regulado polo Real decreto 205/2005, do 25 de febreiro. As referencias ao ano 2005 contidas no devandito real decreto entenderanse feitas ao ano 2006.

Disposición adicional única. *Traballadores admitidos a programas anteriores.*

Poderán ser admitidos ao programa que se establece neste real decreto os traballadores que cumpran os requisitos exixidos no Real decreto 205/2005, do 25 de febreiro, así como as dúas condicións seguintes:

- a) Non ter sido beneficiarios do programa de renda activa de inserción establecido para o ano 2005, salvo que se incorporasen a aquel por acreditaren un grao de minusvalidez igual ou superior ao 33 por cento, ou a condición de vítima de violencia de xénero.
- b) Non ter sido beneficiarios de tres programas anteriores de renda activa de inserción.

Disposición derradeira primeira. *Vixencia.*

1. Os traballadores só poderán ser admitidos ao programa regulado neste real decreto e obter, de ser o caso, o recoñecemento da renda activa de inserción após solici-

tude, que poderán presentar desde a data da súa entrada en vigor ata o 31 de decembro de 2006.

2. O programa regulado polo real decreto producirá efectos ata o 31 de decembro de 2006, sen prexuízo de que as accións e percepcións derivadas deste se poidan realizar, concluír ou percibir con posterioridade a esa data.

Disposición derradeira segunda. *Prórroga.*

O programa regulado polo Real decreto 205/2005, do 25 de febreiro, cuxa vixencia se prorroga por este real decreto, poderá ser obxecto de nova prórroga por disposición expresa do Goberno, após consulta a interlocutores sociais.

Disposición derradeira terceira. *Habilitación normativa.*

Facúltase o ministro de Traballo e Asuntos Sociais para ditar as normas necesarias para o desenvolvemento e aplicación deste real decreto.

Disposición derradeira cuarta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 31 de marzo de 2006.

JUAN CARLOS R.

O ministro de Traballo e Asuntos Sociais,
JESÚS CALDERA SÁNCHEZ-CAPITÁN

MINISTERIO DE AGRICULTURA, PESCA E ALIMENTACIÓN

7027 *REAL DECRETO 394/2006, do 31 de marzo, polo que se modifica o Real decreto 2/2002, do 11 de xaneiro, polo que se regula a aplicación da iniciativa comunitaria «Leader Plus» e os programas de desenvolvemento endóxeno de grupos de acción local, incluídos nos programas operativos integrados e nos programas de desenvolvemento rural (PRODER). («BOE» 94, do 20-4-2006.)*

A evolución na execución, tanto da iniciativa comunitaria «Leader Plus» coma do programa PRODER, puxo de manifesto a necesidade de adaptar a súa regulación, no que se refire ao procedemento de transferencias dos fondos do FEOGA-Orientación e ao límite, en relación coas dotacións públicas postas á súa disposición, que os grupos de acción local, que xestionan o programa PRODER con capacidade resolutoria plena, poidan destinar a gastos de funcionamento, en igualdade de condicións co que, para este fin, destinan os grupos de acción local que xestionan a iniciativa.

Por outra parte, en aplicación do disposto nos artigos 7.7 e 31.2 do Regulamento (CE) n.º 1260/1999 do Consello, do 21 de xuño de 1999, polo que se establecen disposicións xerais sobre os fondos estruturais, a Comisión ditou novas decisións modificativas daquelas que, no seu momento, aprobaron os programas da iniciativa comunitaria nas cales, nuns casos, se incorpora a indexación de

fondos comunitarios para os anos 2004, 2005 e 2006 que, pola súa vez, por aplicación da taxa de cofinanciamento, modifica á alza a contribución financeira das administracións nacionais, e, noutros, reduce o financiamento comunitario sen modificación do cofinanciamento nacional.

Na elaboración deste real decreto foron consultadas as comunidades autónomas, as entidades representativas dos sectores afectados e a Federación Española de Municipios e Provincias.

Na súa virtude, por proposta da ministra de Agricultura, Pesca e Alimentación, de acordo co Consello de Estado e logo de deliberación de Consello de Ministros na súa reunión do día 31 de marzo de 2006,

DISPONGO:

Artigo único. *Modificación do Real decreto 2/2002, do 11 de xaneiro, polo que se regula a aplicación da iniciativa comunitaria «Leader Plus» e os programas de desenvolvemento endógeno de grupos de acción local, incluídos nos programas operativos Integrados e nos programas de desenvolvemento rural (PRODER).*

O Real decreto 2/2002, do 11 de xaneiro, polo que se regula a aplicación da iniciativa comunitaria «Leader Plus» e os programas de desenvolvemento endógeno de grupos de acción local, incluídos nos programas operativos integrados e nos programas de desenvolvemento rural (PRODER), queda modificado como segue:

Un. O punto 3 do artigo 19 queda redactado do seguinte modo:

«3. Os programas comarcais determinarán, de forma separada, as estratexias de desenvolvemento que se executarán mediante proxectos de gasto ou investimento por conta de promotores perceptores finais, e o sistema de xestión e funcionamento do programa por conta do grupo de acción local, cuxos gastos non poderán superar o 15 por cento do importe total das dotacións públicas postas ao seu dispor, nos supostos previstos nas alíneas a) e b) do artigo 15.1, e do 10 por cento, nos demais casos.»

Dous. O primeiro parágrafo do punto 2 do artigo 26 queda redactado do seguinte modo:

«Os fondos comunitarios procedentes de FEOGA-Orientación, destinados a cofinanciar os proxectos a que se refire esta norma, transferiranse, nos supostos previstos nas alíneas a) e b) do artigo 15.1, aos grupos de acción local, directamente ou a través das comunidades autónomas que subscriban o oportuno convenio coa unidade administradora, como autoridade pagadora, do citado fondo. Nos supostos da alínea c) do mesmo precepto, transferiranse, en todo caso, ás comunidades autónomas.»

Tres. O anexo I, no que se refire ás dotacións de fondos comunitarios e contribucións financeiras da Administración xeral do Estado, aprobadas mediante decisións da Comisión, modificativas das decisións aprobatorias dos programas da iniciativa comunitaria «Leader Plus» e, polo que respecta aos fondos FEOGA, sen prexuízo de posteriores correccións financeiras que puidesen derivar da aplicación do artigo 31.2 do Regulamento (CE) n.º 1260/1999 do Consello, do 21 de xuño de 1999, polo que se establecen disposicións xerais sobre os fondos estruturais, quedan cuantificadas do seguinte modo:

Comunidade Autónoma	Leader Plus	
	FEOGA Euros	AGE (MAPA) euros
Andalucía	88.027.832	15.815.851
Aragón	38.671.315	13.470.509
Principado de Asturias ..	17.401.963	3.063.153
Illes Balears	4.564.280	1.632.723

Comunidade Autónoma	Leader Plus	
	FEOGA Euros	AGE (MAPA) euros
Canarias	14.191.962	2.739.697
Cantabria	9.058.863	1.574.954
Castilla-La Mancha	54.953.790	9.561.960
Castilla y León	70.218.733	11.884.520
Cataluña	25.442.136	8.819.940
Extremadura	32.564.172	5.720.439
Galicia	55.462.623	9.980.219
Madrid	6.411.714	2.177.946
Región de Murcia	12.110.187	2.058.732
Navarra	8.276.333	2.544.147
La Rioja	5.554.052	1.899.636
País Vasco	5.523.799	0
Comunidad Valenciana ..	30.529.884	5.268.101
Programa nacional	23.101.710	14.212.147
Total	502.065.348	112.424.674

Disposición derradeira primeira. *Título competencial.*

Este real decreto dítase en virtude do previsto no artigo 149.1.13.ª da Constitución, que lle atribúe ao Estado a competencia exclusiva en materia de bases e coordinación da planificación xeral da actividade económica.

Disposición derradeira segunda. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 31 de marzo de 2006

JUAN CARLOS R.

A ministra de Agricultura, Pesca e Alimentación,

ELENA ESPINOSA MANGANA

7028 *REAL DECRETO 395/2006, do 31 de marzo, polo que se establecen medidas de ordenación da frota pesqueira que opera con artes fixas e artes menores no Mediterráneo. («BOE» 94, do 20-4-2006.)*

O Regulamento (CE) n.º 2371/2002 do Consello, do 20 de decembro de 2002, sobre a conservación e a explotación sustentable dos recursos pesqueiros en virtude da política pesqueira común, establece como obxectivo a explotación sustentable dos recursos acuáticos vivos e da acuicultura no contexto dun desenvolvemento sustentable, tendo en conta de xeito equilibrado os aspectos ambientais, económicos e sociais.

O Regulamento (CE) n.º 1626/94 do Consello, do 27 de xuño de 1994, polo que se establecen determinadas medidas técnicas de conservación dos recursos pesqueiros no Mediterráneo, regula os requisitos mínimos relativos ás características das principais artes de pesca e as mallas mínimas das redes neste caladoiro.

A Lei 3/2001, do 26 de marzo, de pesca marítima do Estado, establece entre os seus fins os de velar pola explotación equilibrada e responsable dos recursos pesqueiros, favorecendo o seu desenvolvemento sustentable